

肖巖詩鈔



自序

在李氏珍藏

詩有別材非關學而後能其信然乎哉三百五篇  
雅頌之成乎士大夫者無論矣其十五國風往往  
出于里巷歌謠之作而聖人錄之于百世傳之豈  
非其材所天授者耶予材拙本不能詩而性癖每  
好爲詩強學焉宜其斷髮嘔心終不得錦囊中佳  
句也雖然予於材不能無恨而於學尤不能無恨  
也憶弱冠時先君子宦遊歸隨侍講席以制舉業  
督課之每月之三八日課四子文一五經義一試  
帖詩一遵國家功令春秋闢試士式而五七古



律絕未之課也偶有所得不敢呈先君子私質諸  
吾家懶雲爲甲乙棄取之當是時少年意氣銳甚  
謂天下事可唾手成俟博取科第後置八股于不  
用并力吟咏何患不工轉瞬三十餘年而身世多  
故哀樂縈心迫人于無可解脫卒以先君子期望  
之殷自得解後敝衣蹇衛僕僕道途偕計吏上春  
官者九乃一得焉而齒危髮禿餘勇已不可賈矣  
嗚呼此豈材之罪哉使當從先君子讀書時即孜孜  
以詩爲事果如少陵之讀破萬卷昌黎之捕逐  
八荒則掣海鯨而酌天漿安見學之勤不足補材



之拙也今老矣悔不可追僻猶未免爰檢篋中所  
藏懶雲定本屬侄琴士擇其稍可者存十之七付  
諸梨棗非忍蹈唐人之諗癡符也老眼眊昏蠅頭  
不易聊假剞劂代手抄以出而求正于當世之詩  
壇哲匠倘有憫其志而教之以所不逮者誓當鑄  
金事之時

嘉慶五年歲次庚申仲秋月上浣肖巖趙良霽撰



涇城東門內雙桂齋鐫



肖巖詩鈔卷一

涇上道長羅肅徵甫著

詠古雜詩

長風掃雲霧萬國開  
朝陽我生值明備  
源流安敢忘三王  
盛文治禮樂垂明堂  
春秋及戰國  
百家如沸蟾  
嬴秦任法律詩書爲之殃  
漢高薄儒冠  
寶氏喜老莊  
千古無孝武  
斯文將遂亡  
其治雖雜霸  
其功在表章

商也文學才實始爲章句  
下逮漢與唐  
六經各疏註  
然而秦火後  
眞僞並流布  
自非明哲人  
反爲聞



見誤吾道非守殘亦非在廣鶩文章盛西京理學  
首南渡

三代貴名教兩晉崇虛無孰爲開其始遂遍士大  
夫清談非不暢難爲平治圖卓卓陶與卞秉禮與  
俗殊山中有宰相深斥元理誣奈何吳老公甘心  
于浮屠捨身不一再廟祀惟菓蔬誰將孔子戒告  
君忠孝謨

鳳皇翔千仞烏鶩彈不去明哲以保身穆生有長  
慮一朝忌設醴引疾去不顧仲淹隋大儒正言拒  
揚素當其獻策時所見無乃誤投閣哀揚雄繫獄



惜班固不見考盤中碩人常獨寤

吾愛嚴君平杖頭挂百錢吾愛管公明不受當道  
憐人事貴无咎吉凶皆後焉二子深于易法龍潛  
在淵惟彼京與郭學道頗有年見幾而不作殺身  
夫何言同術各異遇但願用者賢

處世不邀譽問心期寡尤一言聊自戲得罪在干  
秋卓哉蘇長公寧非君子流奈何排洛黨而且毀  
武周嵇康太傲玩范滂非善柔彼皆遭殺戮此以  
貽謗訕

和璧貴完璞于將宜斂鋒小人常恕已君子思反



躬禍福人所召未必天心蒙奸雄激時論宦豎苦  
交攻漢唐及勝國千古覆轍同處士而橫議申屠  
心憂忡脫然獨無累吾希郭林宗

東京黨禍興張儉亡命走王戎一鄙夫竹林與之  
友乃知名流中亦復雜賢否知人良獨難擇交貴  
不苟阮公識未洞憂穰言誰咎郗管負高風子魚  
作龍首

太上有立德立言又次之躬行未能踐焉用虛車  
爲南華務明道乃憤小兒欺始知莊列徒大半是  
浮辭言者心之聲古道今則非安仁閒居賦子昂



感遇詩其行無足述其文固如斯

多岐失鄰羊五技困鼯鼠勸學歸于一荀子頗近  
古伊川勤綴緝用心良獨苦哆口談良知功名不  
足補文章一小技立意擇所主栗里發高唱於道  
未齟齬雅頌旣淪亾斯人不易覩

擬阮嗣宗詠懷

鳳皇棲崑崙蒙鳩繫葦苕萬物各有託不處非其  
巢列坐無與歡驅車出荒郊零雨凋楓林青霜折  
蘭皋榮華有時歇百歲安能逃平原鬱邱墓狐兔  
窟蓬蒿誰起冢中人而與辨英豪束髮誦詩書汲



汲嗟徒勞一舉謝塵樊控鶴從松喬

擬左太冲招隱

夙願謝塵鞅杖策棲林邱荒途不見人落日聞溪  
流茅廬出斷壁灌木環四周靜嘯撫鳴琴逸韻凌  
清秋風雲擾壯懷泉石陶隱憂古今天地間得失  
同一漚濯纓淨浮埃採芝充乾饌永結箕穎侶同  
此逍遙遊

擬陶淵明田居

懷憂苦年促入世愧才疎種苗在東臯晨夕還荷  
鋤問余何苦爾所患有此軀常恐一朝情頓令三



秋虛野老四五人携榼叩我廬  
各道桑麻長濁酒聊共娛既醉  
復何事相與步郊墟前林來遠  
風新苗動徐徐

擬謝康樂遊山

深谷變朝昏雲霞遙隱顯循途  
銳深入延景屢迴轉崖斷裊危  
梁水窮盡絕巘陽林紆碧草陰  
壑結蒼蘚巖峭遠天低野曠清  
疎展適我皆新奇遇物無顯淺  
心瑩境亦夷慮淡情自遣有懷  
棲鄭谷無淚墮羊峴夙聆達生  
言茲遊庶能踐

擬鮑明遠從軍



哀蓬去本根流轉隨風狂斷鴈出塞北飄飄入雲  
翔小人自偃息壯士行慨慷主憂臣當辱焉敢戀  
故鄉平明辭戚里薄暮臨殊方涼秋八九月塞草  
忽以黃鐵衣耀寒日金鼓咽嚴霜人馬同時乏殺  
氣迴穹蒼生當入玉門死當橫沙場

擬湯惠休怨別

涼風卷簾幕明月生庭陰披衣滅華燭含情理瑤  
琴美人隔雲端千里同此心蜘蛛網虛壁絡緯鳴  
深林蘭蕙不再芳霜露苦相侵朱顏恐非昔離愁  
還至今夜長積清涕夢短回寒砧前響落葉傾



聽非足音

謁董五城公墓

我生不識古人面  
晝思夜夢時相見  
八荒百代精氣通  
况乃桑梓託同縣  
憶公釋褐成化朝  
早批龍鱗觸雷電  
經筵輟講誰能爭  
御史湯鴈公同傳  
先是鄒李刻大臣  
大臣鷹犬讒言煽  
吉人獄起黨禍興  
杖廷摘戍多嚴譴  
賴有王公申救之  
天顏霽怒還垂眷  
遂增祿秩佩銅符  
屢寄旬宣樹侯甸  
甘棠陰雨遺愛存  
生爲立碑死追薦  
毅皇在位羣盜橫  
西江一帶多攻戰  
詔以我公代王哲  
繡衣巡視恩



威逼破膽羣驚韓范來抱頭已作狐鼠竄幸免郊  
迎多壘羞歟遭夜落大星變若使居官假數年小  
豎宸濠敢離叛功留青史萬古存賜出織文一時  
羨褒忠恩命天子思銘石鴻文尚書譔我來走上  
鳳皇山丹楓翠柏雲霞絢石馬叅差野蔓纏古碑  
斑剝青苔片公之精魂應未消或曉箕尾時潛現  
高墳百尺公歸來野菊江籬設清奠

文孝子詩

富貴不如負薪嗟文孝子能養親養終父母身慕  
終子身有司表其事上之天子制曰旌其門或



爲繪厥圖或傳以文孝子之事遠邇莫不聞何待  
我言我言不知止嗚呼誰非人子誰爲人子孝子  
獨如此我瞻鴻戟愧憾欲死

鴻戟山名孝子家居其麓

### 包貞婦查氏詩

萬物皆有託我獨何辜燕婉之求得此侏儒非夫  
以爲特天乎天平天絕其人道天絕其子姓爾婚  
我嫁厥父母舅姑之病而婦曰有命侏儒之生婦  
也事之侏儒之死婦也誓之無論生與死從一而  
終我歌其事以俟採風

### 古劍篇



江潭正苦蒸雲熱那得涼飈舞回雪昆吾冶石成  
龍泉三尺寒漪映明月良工鑄此實苦心斷髮剪  
指飛炎塵十年始向洪爐出蛇龍天矯流電疾拭  
以鵬鵠光熊熊金環玉匣寒芙蓉提出滿堂皆歎  
息風氣射人視不得飛血曾剗碧海鯨如泥歟截  
藍田璧自信騰輝近俊英豈知失足埋豐城夜來  
紫氣衝牛斗空使荒郊神鬼驚

藍山亭

極目星潭外叅天有數峯四邊松蔭合一徑晚烟  
封陰壑含春雪飛泉瀉野春藍山亭子在稍憇入



雲筇

自寶峯遊銅峯

危崖上朝日陰壑開寒雲憑欄展清眺廓廓萬景  
陳銅峰一坏耳天半立嶙峋窮秋林影跡寓目無  
塵氛終惜烟霞幻焉知面目真伊余慕竒秀蠟屐  
不辭勤下穿雷洞曲

雷洞爲寶峯諸景之勝

遠問雀池津

雀池

爲銅峯諸境之勝

經霜草路滑屢怯憇雲根仰顧丹梯蠶

俯視清溪分浮嵐無定趣陟險乃得新攀藤轉絕  
壑竒石碎苔紋或如劍戟削或如虎豹蹲或立而  
或仆萬象羅紛紜大哉造化力不着雕鏤痕片石



與五岳一氣咸氤氲不然寶峯外胡有此山尊一  
朝逢二美幽賞融心神歸來窓下卧夢落山月昏

秋夜讀昌谷詩

閣迥與雲棲簾虛涼月入竹逕絕人踪靜夜流螢  
集遺編探錦囊嘔心搜艷什鬱邑屈子懷窈窕山  
鬼立如聽鮑家詩石豐寒漏泣

寄翟懷清先生

秋風萬里暮雲愁落葉空山獨倚樓我輩由來如  
野鶴先生何處索浮邱泊舟江上楓林晚聽鴈蘆  
邊夜月幽

時以歸舟聞  
雁詩見寄

十載飄零書劍客不堪攬



鏡雪盈頭

贈別翟芝三

烟波九里送行舟  
釣雪花潭憶舊遊  
別後不知水深淺  
君歸試上踏歌樓

漆林渡

泊舟漆林渡  
映月水潄洄  
山色無今古  
行人自往來  
市烟團樹杪  
漁火隱潭隈  
太息題詩客  
騎鯨去不回

舟過藍山阻雨

藍山秀出西南鄉  
屏風十二雲錦張  
石根到水一



千尺下有窟穴魚龍藏  
朝鐘暮鼓巖谷裂驚起  
龍遊八方仰看雲氣生  
石壁滿山竹樹隨風狂  
我欲停舟躡遊履奈此  
急雨侵帆檣潛心默禱  
百不應山鬼何意埋芬  
芳君不見韓公南遷上  
衡嶽祝融天柱開清光  
坡老登州看海市重樓  
翠阜浮秋霜是皆正直  
動神鬼豈以耳目煩寫  
蒼嗟余敢與昔賢比  
扁舟久繫徒徬徨造物  
有心警遊惰不遣烟雨  
開斜陽推蓬且復瞻四  
野孤燈隱隱來崇岡  
江潭無月夜深黑鳬鷺  
飛盡天蒼茫

舟夜



野宿昏烟歛愁牽客夢醒流星低遠樹落月動寒汀  
欹枕灘聲壯推篷水氣腥誰家臨古岸遙夜一燈青

春日舒溪看桃花

闌干斗柄搖春風染紅刷翠勞天工楊柳含烟照  
溪水溪上落霞飛不起我來三見桃花開紅雲吹  
落琉璃杯溪邊踏翠人如玉絳衣拂露花映肉蚬  
蝶雙飛鳥和鳴俱於此景深有情人間日暖春如  
海武陵仙客今何在暮色催人上馬歸明朝一片  
紅塵飛



重遊銅峯

銅峯吾舊遊未盡山之妙聳翠摩蒼穹百里烟雲  
罩飛泉與石竇過眼難強號有如讀古書淺深隨  
所造誰于一日間而能窮興變秋冬木葉脫石徑  
苔危陷春陽一披拂萬物有光耀及茲不急往恐  
爲山靈誚阿咸躡後塵惠遠爲前導時同自脩上人姪蘊輝  
同行兩三人步步逐幽好穿林憑鳥翰陟澗踐猿  
踔宿昔志未酬于今領其要非天殫神奇誰開此  
雄鷲欲叙所經觀刻畫恐不肖中峯忽平曠枕石  
發歌嘯其右有雀池一勺通石竅冬春絕乾溢海



眼貯清澳左流會寒泉活活注丹竈修鱗入地蟠  
綠蘿垂影倒曳杖上前峯彷彿凌海嶠誰爲建浮  
屠俯仰令心悼旁臨不測谿一墜那可料危途困  
登陟小憇趨佛廟山僧接殿勤茶灰供咀噍空堂  
聞異香默坐鎮浮躁出寺覓後徑攀藤穿窈窕稠  
疊亂峰堆陰晦分天貌下有仙人橋可望不可到  
是時新雨後天氣淨如掃草木鬱葱蒨雲霞燦光  
照遠村間林麓平疇接溪隩鬱鬱暮山蒼翻翻棲  
鳥噪平生抱勝情遇境展清眺最有斯遊奇漫以  
歸途告眼前失佳趣過後徒悔懊



重遊莖草禪林

同姪  
蘊輝

穿紅踏翠入山谷水靜雲飛抱茅屋屋前松檻皆  
十圍此境彷彿猶在目阿咸雅意愛林泉一日踏  
遍銅峯顛薄暮歸來問莖草擬尋勝地兼叅禪但  
恐峯回迷水樹邀余指點桃源路峻坂危梁舊自  
知川光谷響紛難數已公謂道敦和尚歡我携客來汲  
水燒竹相追陪清談滿座花雨亂一洗胷中千點  
埃梯雲馳步登高閣飄飄衣帶天香落不知日色  
暗千峯却聽疎鐘流野壑簷前鳥宿春花飛三年  
不到到忘歸林巒寂靜自可樂不嫌草露沾人衣



夏日獨酌

人苦夏日熱吾覺夏日涼  
高峯瀉新瀑草樹含清芳  
洞口綠蘿密屋後新竹長  
開窓引微風歸鳥喧夕陽  
興來成獨酌一詠復一觴  
忝差見遠峯窈窕雲霞光  
焉知天地內何者爲仙鄉  
吾醉但欲眠呼童拂石牀

友有談遊仙者作此示之

士有不得志託跡林泉幽  
烟霞生虛壁松柏蔭危樓  
閒居撫今古世事良悠悠  
羨彼安期輩渺然乘玉虬  
采芝干峯頂濯髮滄江流  
揮手謝時人入極



隨之周朝吾至海濱夕吾至圓邱形當與物化神  
當與天游

丹谿有道士出入駕烟鴻遺我一玉匣上有雙蟠  
龍開匣見素書字跡雲溟濛蒼顏未曾有嵇康諒  
難通我欲從之遊兩腋無清風太息非仙才擾擾  
塵土中鍊石而飲氣不救饑寒攻

詩書束高閣田畝荒蒼苔眼前多廢事逸志凌蓬  
萊蓬萊橫海上雲氣鬱不開望之未可得而況升  
其隈秦皇與漢武妄意金銀臺惜哉爲藥物舟中  
老童孩



春秋代成歲日月互周天萬物有變化吾身初獨  
全獨全非不樂此理終杳然人生天地內耕讀隨  
所專焉能等木石冥心謝世緣騎鯨入東海親戚  
皆棄捐孔孟無丹經石室留奇篇

秋夜讀放翁詩

蘇黃已死風雲閒渭南伯復生人間詩筆淋漓鬼  
神入草書屈強蛟螭蟠興來一吸百壺盡踏雪射  
虎遊南山丈夫功名馬上得本意生奪松亭關豈  
知劍外老壯士鶯花十載悲微官登樓常濺憂國  
淚吟詩肯作蟲聲酸橫戈擁馬意氣出楊范不敢



來登壇惜哉世人看翡翠誰知雲海鯤鵬搏滅燈  
掩卷三歎息牀頭寶劍秋水寒

秀峰寺

竹密疑無路天開忽一峰禪房依斷壁落日度疎  
鐘鳥語中林靜雲陰萬壑重客心無所累隨意破  
苔封

偶感

櫻桃楊柳奈愁何世事由來東逝波一別春光纔  
轉瞬夕陽籬畔得秋多

約舒惟善遊白沙山



層岡逶迤奔白沙奇峯遠壓青天斜勢如長劍出  
寶匣破空直上流雲霞是時新晴秋氣爽翠嵐百  
尺浮窓紗近山遠嶺勢環拱窮眺不礙蒼烟遮我  
欲乘興躡芒屨穿雲踏石窮嶺呀聞道高崖不可  
上懸梯鬱屈如長蛇絕境難到無客共忽憶先生  
天一涯閉門手自煎新茶清腸吐句紛天葩九州  
五岳羅几席臥遊一室搜荒遐却憐佳節重陽近  
東村綠酒西村花巖巒水木留清華相從永避塵  
世客醉看夕陽翻暮鴉

石上



日坐萬山中不識山中趣偶來石上立幽賞忽而  
遇樵隨暝色歸鳥與浮雲去極目見遠村蒼然間  
平楚環溪逶隱見崇巒叠奔赴拄杖欲攀尋新月  
挂寒樹

寄懷靈巖自脩上人

落日望靈巖巖空露茅屋深秋木葉脫天際入遊  
目如聞夜靜時梵音落脩竹

題翟翁載德小照

生不願駕鴻乘紫烟又不願騎驢入長安獨携茶  
爐訪古跡釣臺高出楓林端南山聳翠壓天外下



有千尺魚龍淵烟波漠漠浮古岸垂虹

岡壘玉墩名

紛鈎連是中信美乃吾土橫琴箕踞懷謫仙永無

兩蠻角上觸豈有百累胸中牽水濱穉子俯空碧

展綸獨把珊瑚竿釣鰲安傳龍伯國採藥何必神

山顛武陵桃花落人世漁舟之子來無緣眼前得

意欲長嘯蟠松怪石驚風湍君不見天隨子乘舟

垂釣烟湖裏又不見雲溪侯得醉即卧青峯頭古

來達士本高朗焉能隨人爲俯仰咄嗟此圖神颯

爽

讀項羽本紀



英雄快覩阿房炬兒女愁聞垓下歌萬古徒憐身  
虎鼠三年苦戰漢山河入關計定同謀少霸楚功  
際反間多千里金城天府國一般荆棘卧銅駝

讀高祖本紀

漢王上壽未央宮劉仲何如劉季功卮酒今聞呼  
萬歲杯羹昔忍遺重瞳中原鹿走憑長劒四海鴻  
飛折大風一自定陶悲楚舞始知豎子未英雄

讀淮陰傳

生死徒爭項羽存功高何處更容身亡齊早在封  
齊日追信還爲紿信人交若張陳難預測羞同絳



灌轉湏親彭王竝醢樊侯繫亦是當時佐命臣

讀魏其傳

可憐杯酒能生禍誰向東朝與解紛持論兩端韓御史銳身一死灌將軍引繩早謝平生客遺詔虛  
垂吳楚歟老禿不如丞相貴惡言飛語巧風聞

讀貨殖傳

山深而獸往淵深而魚生地富方物聚人富仁義  
名賢者出北門喟然摧中情既難據要津出入儕  
公卿何不遊都市緩急操奇贏形神雖勞悴衣食  
生光榮莫以田農拙秦陽起服耕莫以酒削薄邳



肖巖詩鈔

卷一

氏方鼎烹

太公貨殖祖賜也億中才范蠡扁舟客管仲三歸  
臺四賢豈不偉猶然思阜財奈何中下材矯志栖  
蒿萊鄒魯去文學風自曹邴開屢貧豈固命致富  
誠有階雍容法先達儉嗇貽後來原憲饔糲旁  
人爲之哀

讀史記雜咏

樹敵由封國建都惟戀鄉范增好奇計坐視殺懷

王

殖臨盡羣雄歸來歌大風四方何所慮雉雥在宮



中

寵鬼誰知貌神君乃有言玉杯來闕下寶氣信新  
垣

刀筆秦時吏圖書漢代猷却嫌廷尉繁不及赤松  
遊

絳侯社稷臣父子下廷尉昔日相君尊今朝獄吏  
貴

雷澤降齊卒滎陽困楚圍此時從武涉何必待陳  
豨

掉舌下齊城何須十萬兵淮陽功蓋世竟使食其



烹

將相一交歡  
安劉如反手  
陸生方代謀  
諸呂已授首

一諾千金重  
平生亦好譽  
曹邱眞上客  
悔寄寶君書

兩賢惟寶灌  
失勢互相憐  
此日田丞相  
前堂立曲旃

秋日寄諸友

天地無端付逝波  
驚心歲月任蹉跎  
少年結客追歡易  
病眼觀書惹憾多  
范叔一寒奚至此  
鄭公三



絕竟如何

謂翟懷清先生

紅顏絕代棲空谷茅屋秋高補

翠蘿

霜落千林木葉斑登樓景物觸愁顏荒村落日啼

饑鳥古洞寒雲鎖斷山座上有人吟楚些夢中無

路邛天關

時查聖源先生以族人之累自沉于寶峯小池中死

年來哀樂真

成幻擬結蒲團老此間

稻粱何處可謀生代食全家寄舌耕萬里江湖愁

短褐百年心事誤虛名

時二兄因公車留京十有餘年

嶧桐幾向

焦時得棋局偏從敗後爭笑讀南華經一卷夜深

饑鼠上燈檠



春鳥秋蟲造物情向人寧有不平鳴散材自分良  
工棄疲馬難堪遠道征莫歎新詩工作祟何湏薄  
俗浪馳名深源未出蒼生憾管葛才華乃爾輕  
欲將耕釣作生涯小築溪山避世譁我筭三年成  
夢幻天教六載占烟霞楚江春雨塞芳草彭澤秋  
風放菊花御李識韓徒擾擾塵飛不到野人家

雨後遊跨鶴礪看瀑布

朔風吹山山欲走山中急雨蛟龍吼倒懸一水矗  
天飛壁立兩崖如劍削今年久旱農夫哀赤雲千  
里凝不開高田下田飛黃埃夏時不雨秋時雨淙



淙谷口驚風雷可憐龍宮珠百斛不敵田家米一  
掬薄寒在身飢在腹跼鶴橋頭看清瀑

### 登樓

風勁秋高萬壑哀登樓對客好呷杯樹盤絕壁雲  
陰落泉挾千山雨氣來斷鴈一聲過小閣饑鳥數  
點下平臺東籬剩有陶潛菊月冷霜清作意開

### 採菊

欲取寒花佐一觴山蔬野菜足餽糧携來衣袖黃  
金燦沁入心脾白雪香湘浦離憂連暮雨南山佳  
氣淡斜陽幽居自有延齡客不試仙人餐玉方



擬李義山

丹梯何意接仙山來是千艱去更艱  
早識浮雲歸海外不須流水出人間  
寒蟲弔月聲初咽春鳥啼花淚有斑  
一自劉郎消息斷蓬瀛路遠隔塵寰  
相逢有恨遽相違月冷空堂獨掩扉  
弱水三千魂屢阻瓊樓十二夢雙飛  
解環不自遺交甫留枕何緣遇宓妃  
一寸春心拋未得荒山夜靜雪霏霏

題梅村詩後

故國鶯花盡他鄉書劍存名高難隱世  
才大易蒙恩雞犬淮王夢衣冠舊友魂  
却羞東澗老白髮假



空門

小詩別包立中

古渡寒風勁前山落日低君家合溪水送我至城西

丹夜

前林繞晚烟遠水迷寒霧漁唱兩三聲扁舟何處去

遊方山

風雪掩柴關尋春一日閒清溪流短艇斷岸接方山古寺寒鐘度斜陽怖鴿還漁樵生計便結屋傍



沙灣

遇翟廷衛

獨掉門前水言尋溪上梅春風吹不盡忽送故人  
來豁我離憂積逢君倦眼開磯頭同把釣得酒好  
卽杯

醉歌行贈翟廷衛

客中對客羞空囊紙窓日暖春茫茫老梅綻紅柳  
舒綠舉杯未得酬東皇舊交不棄邀我飲床頭酒  
甕開泥香銀瓶蠶勺實羽觴輕紅瀉作琥珀光脣  
焦口燥舌本僵一滴快如甘露漿引滿傳空過三



爵頓覺挾纈迴春陽燈花瞥瞥搖倦眼芒角隱隱  
撐枯腸酒終更致美肴饌芹羹魚膾兼菰粱憶初  
弭棹踏歌岸回風急雪摧危檣與君三日同卧起  
歲暮結束匆匆裝兩曜轉轂互奔注十年彈指催  
星霜余既長貧殉筆硯君亦食力勤耕桑未能沉  
酣學阮籍早覺懶情如嵇康謁來山庄一聚首我  
非少小君老蒼過從不復阻風雨夾居無異臨清  
漳便湏痛作十日飲不顧俗眼譏疎狂我雖弱敵  
難勝強前却且領偏師張軍令嚴如朱虛章老兵  
既醉難遁藏微醺兩頰神飛揚談鋒蠶起摧劍鋌



不見千鐘與百榼古來聖哲俱醉鄉

憑欄

信美非吾土憑欄獨憶家將歸因聽鴈且住爲看  
花水閣流雲寂疎籬瘦竹斜前山明月上不碍碧  
窓遮

舟中

暖日融歸路長風送小舟消殘千嶺雪併入一溪  
流生意憐春草閒心付野鷗欲隨漁父去鼓枻入  
澹洲

望馬頭磯



急浪廻船尾危磯見馬頭高高騰霧上曲曲放溪  
流落日移漁艇輕雲罩佛樓磨崖留四字鎖鑰壯  
猷州

江蘇明府題其  
壁曰涇川鎖鑰

病後至寶峯諸友出示賞牡丹詩

卧疴百日離雲巖反魂筮與勞巫咸扶筇強起對  
花立飛香一片霑春衫嘯風踏翠聊可樂終嫌近  
市拘塵凡遙憶峰頭良友聚談天炙轂聲誦誦有  
時探竒躡飛鞚松根石窟驚磨巖五月瓜蔓正新  
漲乘風一日張輕帆墮紅濃綠望滿眼不覺足力  
窮嶄嵌隔窓石榴尚灼爍棲梁乳燕聞呢喃國色



已老天香死賞花妙句堆瑶函急展霜縑揩病眼  
空腸冰玉勞彫劖我聞開元之中民上貢阿瞞未  
賞遭鹿銜又聞姚黃魏紫來洛下惟演作始誠詔  
讒名花雖帶富貴號自與世味殊酸鹹憶初頗費  
栽培力階前惡草親鋤芟覓土移根辨肥瘠妙與  
造化叅機緘所惜花開阻一酌煎酥穠艷空貪饒  
我今力疾還種藥空山日暮持長鑱

舟泊蕪湖

赤鑄山頭落日橫雲帆葉葉下江城寒潮直捲嶼  
磯沒夜火遙連牛渚生客路逢秋初聽鴈狂歌捉



月想騎鯨文章謝李高名在望斷烟波萬古情

太白樓

千里湘江水遙連采石濤空山遺廟在清怨接離騷

謁卞忠貞公墓

歷陽內史倡亂首司馬食炙忘其口潛師夜入丹  
陽道卞公督軍出征討西陵既敗青溪焚力疾苦  
戰回風雲父爲忠臣子孝子殺身成仁同日死借  
問召寇來者誰天子之舅庾元規奉頭鼠竄棄宗  
社棟折榱崩委鍾雅賊平猶得刺豫州江東賞罰



吁可羞是時國危主方少羣臣德望司徒黨虧法  
從私誰敢爭得公一語人心驚悖禮傷教誰能正  
得公一語人心定公之學問蓋有源不與王謝空  
談立全家大節照千古碧血忠魂一抔土行人下  
馬薦溪毛清秋白日江天高

邀笛步

作客無心邀玉笛誰家三弄咽寒潮淡烟斜日青  
溪曲吹得秋光上柳條

別寓舍主人

三年虛作金陵客我輩難爲鹿豕羣紫燕情多臨



社日皂鵬眼疾入秋雲樽前遠樹含殘雨別後澄  
江帶夕照慚愧貧交相望切獨無健筆掃千軍

肖巖詩鈔卷一終



肖巖詩鈔卷二

涇上趙良霽蕭徵甫著

大慧菴

溪截萬山窮緣溪一徑通  
小橋連竹塢清磬出禪  
宮葉抱寒蟬墮雲隨去鳥空  
危途難久佇病骨怯  
秋風

嵐氣封山徑溪光抱寺門  
聞香空百累見佛靜千  
言客去詩畱壁僧歸月  
度垣聽鐘寒雀聚暝色入  
荒村

九日中村登高



村中看山山翠橫山頭下視村烟平翠烟迴合萬  
重紫一幅丹青收不起況復佳節值重陽畱犁酒  
泛茱萸香醉來一曲秋風起鴈飛不斷江天長山  
深谷暗斜陽暮落葉棲鴉紛無數人生行樂須及  
時日月西馳水東注君不見峴首碑漢南樹

過董漢昭山庄

谷口見歸樵因之過短橋路從飛鳥斷嶺有白雲  
招荒草須開徑長林任挂瓢探幽憑足力不覺入  
山遙

過蘇嶺



整駕出平陸杖策登重嶺猿鳴林谷曙霧散巖壑  
靜山高旣稠疊磴接未完整行人緣秋毫前趾交  
後頸屢憩枯樹根漸出招提境危亭安石隙落葉  
覆山井行畏午日炎坐覺霜風冷負戴者誰子揮  
汗方引領

捕蝗行

江邨八月水雲白擊藁除田都種麥前山過雨抽  
新芽一飽明年應可獲飛蝗引子來聯翩騰空蔽  
日如雲烟長江惡風吹不落頃刻飛渡千山顛下  
者食根上者葉東村甫過西村連螟螣孟賊田祖



去欲昇炎火無由燃父老倉皇驚且走牒書上報  
令與守羣盜越境虎渡河古人盛德今無偶蝗生  
自北不宜南此事何人當執咎軟裘快馬來者誰  
虬鬚小吏紛奔馳手持縣牘押農長捕蝗有令行  
莫遲爾富出錢貧出力不則盛怒加鞭笞十人九  
人往從役雞犬不得安茅茨霜風一夜蝗蟲死縣  
吏又來掘蝗子纍纍螻蛄入地伏哀哀野老向天  
哭共看秋成節序過草枯沙白無遺禾蝗之爲害  
誠無多待得冬來三尺雪凍且僵矣如我何眼前  
之人無處避嗚乎蝗乎賢于吏



寶峯

崇巖古洞闢瓏玲  
放眼乾坤一草亭  
中酒情懷殊落落  
釀花天氣半冥冥  
雲邊水界雙崖白  
檻外峯排九點青  
擬把生涯學農圃  
明窓耒耜寫遺經

周心田畫松馬歌

天馬一鳴羣馬啞  
萬里驍騰流汗赭  
歸來快脫籠頭韁  
獨馱風沙臥林下  
馬旁偃蹇立兩松  
虬枝交錯垂青驥  
上有綠蘿纏陰藹  
下有細草鋪蒙茸  
伯時胸中貯神駿  
韋偃筆下回長虹  
二子精神最專一  
遂令後世作者難  
爲工周生妙手益  
有本家法



肖巖詩鈔

卷二

授自崑來翁崑來好畫兼好俠筆鋒劍氣交相融  
脫巾濡墨窮萬狀獨寫千霄伏景變化不測之真  
龍飛騰神尾時一掉卓立雲氣迷千重畫松畫馬  
皆此態要在良工一意巧變生無窮或云天都峯  
鱗而爪鬣形體同或云太乙沉權奇倜儻精靈通  
形摹意擬各難肖但覺四壁颯颯生雷風長松翻  
濤馬驚顧不知誰化飛龍入雲霧

題列子御風圖

君不見呂梁懸水三十仞脫險行歌勞慰問又不  
見山中之林烈火焚出入石壁隨烟燼得全于酒



忘墜車善藏其刀快游刃匹夫薄技尚有然而況  
心死形廢以神運昔者列禦寇學道何虛冲三五  
九年凡屢進然後眼耳鼻舌交通融風乘我乎我  
乘風木葉幹殼隨西東下窮黃泉上碧落揮斥八  
極無停蹤久居鄭圃不得意乃以諧詞隱語驚頑  
聾華胥國邑交寐寐化人臺榭凌天中我取其書  
再三讀大旨多與逍遙同約束天地等毫末拋擲  
萬事歸虛空二子豈非有道士口雖誕慢心憂忡  
若知末流遽有申韓輩應教收聲培戶如蟄蟲觀  
君此圖三歎息安用矯羽凌崆峒



喜拱辰大姪歸里

不將綵服換華簪歸向南陔補雅音官有清聲繩  
祖武吏能孺慕慰親心雲中海鶴秋旻闊江上蓴  
羹客思深舊日儒生風味在論文寒夜酒頻斟

與翟祖文夜飲

暮鐘缺月近黃昏抱膝圍爐共一尊謬誤當爲彭  
澤恕文章細與杜陵論雪花肥壓燈花瘦風力寒  
欺酒力溫夜半聞雞眠不得披衣看劍慰愁魂

居寶峯者九年矣明當別去作三詩

天地始開闢衆山隨風濤問茲一拳石何年卓立



煩神鼇秦王鞭石石東走女媧補天天雨漏偶然  
一擲來此間餘者散落米顛袖幽洞與懸崖始或  
棲鳥獸後人稍稍陟其巔飛輅一縱凌雲烟誅茅  
卜居頗靜便姓氏泯滅今無傳今無傳後復繼山  
川不變人物異來者墮淚咸流泉不知造化特兒  
戲

我聞太行王屋高連雲愚公移去東南分操蛇告  
天天心佑乃遣夸娥二子負山走問茲突兀撐青  
空胡不移之京洛中或者燔柴瘞玉秦漢封否亦  
名人入題咏磨崖勒石畱無窮昔者李青蓮頗愛



涇川水風送花潭帆雲曳藍山履是時山靈何醉  
夢不以奇巖邀遊鞵若遇騎鯨醉徜徉羣峯羅列  
非伯仲後人豈無遊山時遊山亦復吟新詩嗚呼  
千秋百代神所知

去者不可止來者不可招種松栽竹十年住亦如  
拙燕營舊巢春容冬骨凡屢見陰雨烟霞昏旦變  
城市慕山林入山轉生怨旣怨則思去將去有餘  
戀所惜山中泉石心或汚世上風塵面山鬼窈窕  
山之幽笑我顛倒夢想何所求答云奇聞壯觀天  
地闊控鶴鞭龍恣遠遊從今請與山林約待我二



十五年返林壑人生困守如醢雞直使胷中鬱鬱  
秋氣惡

和王靖夫遊青山詩韻

新詩豁我雙眼明掃雲捲雨開春晴驅將邱壑來  
筆底臥遊永結山靈盟王郎勝情兼勝具林巒猿  
鶴紛逢迎平生高跡誰能似合與求點爲弟兄忽  
逢佳節一百六攜僧挈伴青山行危崖怪石欲崩  
墜古藤細葛交纏縈杖交臂接凌絕頂俯視百里  
溪山平白日無人古寺靜恍聞剝啄敲枯枰世事  
廢興如一局每從勝地悲浮生蘭亭峴首亦何有



況乃富貴浮雲輕古人夜遊良有以焉能汲汲爭  
虛聲羲和鞭日苦難住東山甫上西山傾百年徒  
爭白駒隙一歲幾見春花榮眼前有景聊自適世  
上無物非天成紅崖碧澗容坐臥狂歌大笑輕公  
卿

過葉接三

兀坐萬山中嗒焉寡所偶晨夕課殘書念我素心  
友積雪消遠峯朝光動虛牖興至輒命駕道遠夫  
何有百折歷層巒一逕入深柳僻名故人歡我來爲  
我傾杯酒今夕果何夕二阮同聚首謂屏垣夜深秉



燭談殘星挂林阜

飛來石

在邑東  
乘山

一石復一石勢如累棋子豈畏祖龍鞭飛來此山  
裏莫學平固湖化作秋鴈起

送江蔗畦明府移署旌陽

惟民有師帥守令操其權令與民較近乃身切恫  
瘝吾涇僻邑耳風俗淳且完其中桀黠者因物斯  
有遷自從我公來撫字平無偏非惟衣食之令民  
無饑寒而又教誨之令民無過愆鳴梟皆至性萬  
物均陶甄如七八月時雨集苗勃然奈何舍此去



使我懷憂煎父老思借寇君門遠且艱悵然失  
慈母遮道相牽攀公才非百里小試如烹鮮操割  
有餘刃游心親古編春花明竹閣秋雨暗遠巒邑  
西多勝地寶峯名獨傳幕嶺亘邑北大小紛聯綿  
登臨無近遠一一窮其巔豈惟山水趣因之懷昔  
賢台山舊書屋廢址垂百年喟焉斬荆棘結構增  
新觀自非仕學優布政良已難寧復有暇日好古  
類流連公今攝旌篆相去咫尺間彼民亦赤子示  
辱仍蒲鞭仁風扇遐邇所至人心安政餘發高詠  
志我琳瑯篇



遊華嚴菴贈天水上人

落日赴層峯祇園曲逕通  
茶瓜逢老衲花雨墮微風  
禪定雲歸樹詩情鶴向空  
好歸黃蘗寺重續一

燈紅

上人師湘月和尚工詩嘗主水西方丈

北遊別五弟

遠別何足詫此別殊含辛  
落地爲兄弟寧同行道人  
念我手與足異體同一身  
五人喪其二如身半不仁  
哀雁失儔侶嗷嗷隨孤雲  
死離與生別何以慰老親  
顧子溫如玉夙性寬且敦  
巧變承色笑潔白侍晨昏  
子能娛杖履吾無憂風塵



早發采石

殘月墮雞聲人喧促曉行江烟寒未散海日澹初生  
捩柁失牛渚張帆指石城何當尋舊壘戰績記開平

江上阻雨

吳姬勸客夜光杯指點江雲鬱不開十里風濤雙  
槳下人從北去雁南來

龍潭渡江

春寒澤國雨濛濛此日張帆趁好風萬里程懷窮  
髮北一杯酒咏大江東水通楚蜀屯高浪雲擁金



焦入遠空遙憶 王師潛度處誰云天塹限兵戎

揚州懷古

夢好江都引興賒

煬帝詩我夢江都好

南朝風物劇繁華蒼

梧紫塞參軍賦水殿迷樓帝子家馬上流螢清夜  
曲春來芳草玉鉤斜行人莫問雷塘路板渚垂楊  
匝暮鴉

董子祠

焚坑禍肆嬴秦後黃老談興漢竇時一代醇儒惟  
董子九江遺愛有荒祠著書欲闢傷麟筆作相還  
輪牧豕兒若比長沙畱賈傳不將詞賦弔湘纍



遊平山堂

平山堂名遠流播翠壁紅泉甲江左平生足跡不出鄉虛擲名山嗟我過燕城二月春氣佳柳絲杏裊花枝慳清溪新漲曲折流畫舫恰容三兩箇長橋架空彩虹垂遊魚迸浪明鏡破隔花人影望便娟夾道園亭迷小大遙聞鐘磬趨上方欲禮龍象瞻蓮座香飄嶺畔梅萬株翠壓樓頭竹千个憶昔歐公擅勝遊把酒登堂萃賓佐一線江從席下流萬重山向盃底臥風流白髮老門生醉翁遺事能續和時尋古壁走龍蛇便覺新詞生咳唾數百年



來作者誰山靈亦似遭轍珂豈乏豪華創建新所  
嗟顏色脂粉沅鑿山注水失天真伐薪輦石哀我  
殫君不見前年 聖詔下東南舊貫無煩磬鼓課

過淮安

六代紛爭事已遙清淮安穩走南條山連芒碭通  
雲氣水到鍾陵急暮潮春雨綠楊生驛路夕陽玉  
笛起城譙無雙國士終塵土千古猶憐勝下橋

渡河

河水從天來襟帶秦豫州導之始積石禹烈垂千  
秋孰能測其源遠上崑崙遊千里始一曲一曲力



益道過徐會淮泗朝宗如列侯前朝督漕政恭襄  
握勝籌上築歸仁堤下濬清江流鄣淮使敵黃刷  
黃資通舟斯人宜廟祀後來無與儔雲梯失故道  
海口成沙洲旁流注洪澤併勢奔淮郵我來值解  
凍春風和且柔滾滾揚沸湯泛泛浮輕鷗俯視不  
敢唾恐爲神所尤去年八九月陰雨慘不收河來  
決堤堰勢欲摧林邱有如兩兵合萬馬肆踐蹂郡  
縣半爲壑河伯怒未休居民遠逃竄存者無一畝  
四瀆于天地譬人血脉周誰其精醫術而塞此咽  
喉源流旣失所泛溢何時瘳 聖人憂南服宵旰



勤遠猷誰與任奔走徒懷雀鼠偷保隄歲增土淺  
見非良謀嗚呼夏德遠萬古魚鼈憂

滕縣道中

敝車羸馬嗟身事薛北滕南促旅裝卜正遺封祠  
廟在田文三窟古城荒關心驛路春花白撲面風  
沙落日黃猶有豐碑傳美政紛紛戰國愧齊梁道旁  
有碑書滕文公行井田處

望嶧山

驅車古邾國引領嶧山麓卓爾一峯起秀色如蘊  
玉洞府敞深幽巖巒分起伏積氣聳層雲餘勢走



尚巖詩鈔卷二

十一

平陸雖無泰岱奇應奪龜蒙綠鄒魯鬱菁英河濟  
助孕毓鍾爲孟夫子道與洙泗續氣直塞天地性  
善破凡俗異學息狂瀾聖典豁朝旭無何秦祖龍  
登山縱遊目乃命丞相斯鑿石樹崖谷篆刻洵入  
神功德非寶錄固宜野火焚一洗山靈辱我來勤  
仰止意不忘私淑想見降神時山頂采雲覆

汶上縣

太白有東樓飲酒詩

東樓敞寂寥懷古一長謠魯酒不成醉詩人何處  
招春生汶水岸雲沒蜀山椒日暮中都道鄉關望  
眼遙



東平州

開河北去古須句石逕陂陀過客愁甲第一門誇

盛事

朱梁瀨

文章五馬擅風流

唐蘇源明

鳳山超忽雲中

見蠶尾空濛水上浮安得湖亭畱信宿好將勝跡  
破離憂

在平縣

縣有魯仲連馬令二村

在山蜿蜒落平陸小邑中藏萬家屋行人弔古乍  
停車但見連村桑柘綠仲連玉貌居園城談笑能  
却強秦兵閱數百年有馬令上書能回天子聽二  
子出處不同道一似雲從一鴻杳解紛不屑顧千



金致主終須焚諫草  
人生貴賤隨所逢  
戰國何如唐太宗  
卽看孟荀困齊楚  
不與房杜同勳庸  
我生抗志希千載  
南北驅馳窮不悔  
縱無火色速騰上  
何必冥心學蹈海  
晚風吹沙落日昏  
主人畱客傾芳樽  
雞蟲得失寧足道  
一石且醉淳于髡

宿腰站戲和壁間韻

地屬高唐州

牀前明月似飛霜  
一曲悲歌最斷腸  
君自客中鄉思苦  
縣駒不是此高唐

德州偶感李景隆事

劃分青冀仗堅城  
靖難師來憾未平  
帷幄老臣爭



諱敗膏粱豎子豈知兵前朝戰血寒流急此日人  
烟曉市清一醉陵州羅酒好擁裘臥任敝車行

景州

春陰開曉晴遙見景州城風色暖無力河水流有  
聲草荒董子宅雲壓亞夫營擬酌昔賢墓茫茫今  
古情

莫州廢城

千載頽垣草不橫燕南趙北竟何成危樓空壯山  
河色殷地旋悲鼓角聲豈有英雄思避世漫將粉  
黛擬休兵向來妄殺劉司馬鑄鐵爲門鎮易京



趙北口

幾曲紅橋雁齒齊綠楊碧草似隋隄輕舟夜火拋  
魚樞野店春風送馬蹄水滙諸流平岸闊雲連大  
漠壓天低行人莫問公孫事殘壘荒城落日西

白溝河

河流不洗石郎耻父事契丹得天子盡棄燕雲十  
六州南人不敢踰白溝十萬橫磨劍安在陽城漫  
自矜奏凱噉飯有所孫勿憂樂禍神亡天不悔晉  
鬼餒而理宜然惜哉終宋三百年神武能平諸僭  
國版圖不到前後山太尉竟死陳谷口魯公敗績



岐溝關稍喜奇兵出土鐙終羞歲幣盟澶淵天下  
有道嚴守扞割地和戎終失筭靖康之禍誰厲階  
河聲嗚咽怨維翰

道上望西山

長安道上車班班驚沙掠面希見山西山秀壓居  
庸關惜其隱見春陰間尸陀林下二龍子冬來潛  
伏寒潭水昨日東風初啓蟄雷碾未振誰鞭起噴  
雲洩霧故閉藏疊嶺層巒違尺咫有如帳內望姍  
姍是耶非耶難諦視盧師忽現清涼境淨掃陰霾  
雖脫頽長劍破匣金出礦寶氣射人爭引領憾我



不能躡飛鞚俯視燕雲凌絕頂千盤紫翠擁太行  
一線風煙接滄溟平生微尚棲巖阿家居江上青  
山多行遊幽薊復逢此娛人窈窕如媚娥乃知西  
北山鼻祖散入東南趨海嶼特留勝槩壯 王畿  
長出慶雲覆天府

燕京

出門一笑望長安挾策來遊得壯觀萬國車書馳  
日下九重宮闕聳雲端燕山北控居庸險遼海東  
浮碣石寒 聖代恩威周遠邇邊防不用請泥丸  
北史流傳古帝都山川形勝九州無徒聞八族雄



榆塞忽闕三朝舊版圖樓號洗粧空夜月園開射  
柳盡春燕分明夢裏華胥路剩有荒墳裂帛湖

歸懷

燕市悲歌弔望諸黃金臺已變邱墟成名 盛世

無屠狗旅食侯門漫曳裾笑看塵途飛野馬慚將

心跡滯公車懷才我不如韓子光範何須屢上書

扶杖西山訪翠微

寺名

娛人昏且有清暉每逢初地

堪招隱綵解征衫便擬歸聽雨中宵悲舊約看雲

萬里夢慈闈花枝草色催春去苦戀他鄉計已非

與同鄉上義塚



我聞于僧嘗有云京師居者惟兩人此心不爲名利縛胡爲三千里外亡其身但見驚沙捲地荒草合風林月黑飛青燐念爾生無所養死無饗一任清明寒食連殘春桑梓之戚古所敦鬼也餒而人酸辛隻雞斗酒相沃酹何必生前戲笑曾相親嗚呼大千起滅如一塵此身劫壞誰能存骨肉自與土同斃精氣應爲神常伸祖宗邱墓在故國狐死正首斯爲仁爾應乘風遠歸去毋徒戀此異鄉三尺墳不見延陵季札葬子于贏博三號直抵宋玉之招魂作詩諭爾爲爾一沾巾九泉之下聞不聞



舟中作

昔往堅冰愁老馬今來暑雨滯行舟可憐道上青  
青柳不遣飛花近御溝

板橋一曲柳毵毵樹裏亭臺水上菴夜半鐘聲來  
客枕依稀清夢到江南

舟中熱甚投古廟納涼遇二客手談

河渠一線流渾渾長堤兩岸堆火雲舳艫銜尾當  
肺門門上疊石高嶙峋壁立凝赤迴斜曛坐令蓬  
底飛炎氛舟子散亂如雞豚納涼競趨高樹根坐  
臥三五自爲羣博戲叫號爭擊樽我時袒肩行曳



跟腰扇障日投荒村村前古廟臨河濱蔭庭松檜  
留長春楸枰剝啄聲微聞中有二客藉草茵我旁  
支頤如石蹲偶然失語爲解紛二客相強張吾軍  
我本無意鬪楚秦勉從對壘兵交屯一子初落收  
全神治絲有緒無先焚碁雖小技未足尊不容得  
失生貪噀雁行虎穴豪氣存知棋豈如劉所云我  
生萬事俱輸人祇此黑白何區分聊借一局消長  
晨意氣不敢囂且塵客聞此語如獲新棄置勝負  
心欣欣眼前忽現清涼因歸舟對月招南薰

舟過淮安



曉風過清口落日臨山陽維舟古城下散步追晚  
涼昨從京洛遊轂擊塵飛揚緇衣聊一濯淮水清  
且長緬惟古才傑歟起日月旁當其未遇時叱辱  
俱備嘗功名付時命漁樵行徜徉浩歌望洪澤原  
樹蒸湖光

大風泊和尚港

向曉氣清和長江流澹沲疾風起天末急浪走輕  
舸涉險屢欹帆捎瀆時側枕鼃鼃助澎湃蘆葦因  
掀簸已覺臥未安疇能立無跛恐怖知何爲怪變  
測誠叵忠信素所仗慈愛天可荷豈其欲玉成而



益此坎珂乘流入斷港繫纜得晏坐心悸脫江深  
目極見山墮履危古所戒好奇志猶頗遂爲方外  
遊一證生前果入門穿隧道登樓面佛火幔捲碧  
天浮巖壓白雲彈茲行雖嶮巖得樂相喧歌殷勤  
謝江神一噫用留我

燃犀亭

慷慨溫忠武陳師戮海鯢登舟頻灑泣此地一燃  
犀萬古荒江碧空山落日低危亭懷舊蹟高義激

征西

時陶侃爲  
征西將軍

峨眉亭



兩峯相對立傳傳萬里江天一小亭應有仙靈窺

玉鏡偷將山色入睂青

玉鏡潭名

遊金頂山

亦名小九華

萬物大小爭何窮一拳石不殊衡嵩池陽爭誇九  
子峯詩人約束投壺中欲向蓉城策短筇飢腸苦  
無糧宿春豈知刻畫勞天工眼前便有青芙蓉不  
覺兩腋乘清風躋攀鳥道趨仙宮天池一勺含冲  
融虬枝倒影連萬松松間細路盤青空臨天怪石  
堆玲瓏高僧趺坐籍草茸至今石上留遺蹤俗傳金地  
藏來此晏坐石上足跡儼然奈何一去不復逢但聞野壑流清



鐘我來絕頂立龍窠兜羅足底雲冥濛雲中千嶂  
立兒童九華未覺誰雌雄較視一壺同不同作詩  
欲問東坡翁

夢中得高閣一聯覺而足成之

依舊空山臥薜蘿飢驅浪走悔如何狂來故態呼  
尊酒夢裏年華付逝波高閣客稀鶯語寂小園花  
落雨聲多殘書堆案從頭檢無術能揮駐景戈

晚步金頂山

靜觀偶自得起步山之中修林一掩抑颯然生微  
風披襟散煩疴臨池濯塵容遠巒上涼月流光入



青松我愛踏松影意若踞虬龍不覺緣碧澗遂爾  
凌前峯境勝忘力倦慮淡見天空倘與若士遇未  
應悲壤蟲

蜥蜴行

小池曲折通泉脉倒映綠蘿垂峭壁深山大澤產  
龍蛇非龍非蛇名蜥蜴或云神物異蜿蜒背負蛟  
文尾青碧平生未夢湖海寬游泳何嫌堦井窄是  
時盛夏午曦赫千山萬山火雲赤行憂龜兆圻良  
田共向蛇醫乞甘澤諒爾一寸腹中藏幾斛冰安  
得騰空掣金電或可緣壁餐青蠅掃地爲壇巨甕



貯擊竹環禱香烟騰老農太辛苦上天所哀矜豈  
忍歲勤動不令苗勃興震雷驟雨任師伯噓枯轉  
潤連千塍試啓泥甕一窺視跂跂脉脉祇如此衆  
人稽首謝龍子貪天之功吁可耻

自題小畫

湖山

山名

山下是余家垣外青山入望斜最是雨中

山更好一山微露一山遮

拜桓簡公祠

宣城內史氣堂堂欲掃妖氛赴建康倡義已先陶  
太尉褒忠應擬卞成陽千年鶴化空山碧落日烏



帝古冢荒

公墓在廟後

一廟猶能存兩晉土人環拜誦

勤王

俞將軍

誓死無他報所知橫戈躍馬颯英姿已令蘭石成  
終古不負桓侯共一祠天下子源真義士千秋南  
八是男兒可憐長史求通問投命君親更有誰

題悟空上人畫蘭

蕙士大夫蘭君子金華仙伯妙形似我謂幽蘭太  
孤絕色香頗與枯禪比上人淡泊學苦空冷灰焦  
穀凡心死獨從靜裏觀萬物爰向空中生百卉百



卉爭春各自芳  
午橋金谷看花忙  
誰向空林抱幽  
獨杳無人跡  
惟斜陽世人所棄  
性所愛抱甕山頭  
勤灌溉九畹常嫌  
蕭艾侵孤芳  
欲製瀟湘佩  
曉霧空濛幽谷姿  
微和駘蕩春山態  
清磬聲中別有香  
楞嚴課罷還堪續  
湖州畫竹直忘身  
上人畫蘭自寫真  
國香禪悟兩莫逆  
興來下筆能傳神  
念我寂居寡交好  
題封遠寄靈  
均草剡藤一幅墨  
光融葉濃花淡交  
蒙茸想見孤高鄭  
所翁

遊平頂山

山爲悟空上人所居

平頂山與小華對  
咫尺相望了無礙  
我從山外得



真山曲折林泉皆可續相看歷盡冬夏容暫別惟  
憂風雨晦有時人語互响答驚起白雲交黶黹道  
人約我遊山中不知山在虛窓內却嫌小華少真  
面轉向平山窺遠黛絕頂憑陵互周覽兩山變幻  
無遺態偉觀自古煩造物發興從今有我輩平生  
困頓守蝸角夢想扶搖上鯨背小華祇是壺中天  
平山未抵須彌芥探奇何緣愜素心問法聊從接  
清話道人妙下一轉語不爲絲麻棄營刪

和友人感秋懷遠之作

望遠頻攀江上樓涼風搖蕩白蘋洲不堪臨水登



山去獨眺荒烟落日秋七發何人捐臥病九歌從  
古抱離憂澧蘭沅芷遙相憶鵲聲中起暮愁

遊蓮臺山

我生與俗多齟齬問禪屢日從浮屠馳坑踰谷終  
未倦山靈入夢相招呼邑東勝境踏已遍芒鞋不  
到蓮峯孤譬若鐵網沉渤海掎摭鎖屑遺珊瑚況  
有能詩老苾芻

謂天水人

導我石徑躋盤紆行吟互

答振林谷松風澗壑調笙竽是時霜寒木葉疎天  
開平遠秋山圖遠村半間林隱見絕頂淨掃雲糝  
糊仰看泉源出巖竇曲注階下涵清虛入門欲濯



塵土足恐驚聽法方池魚蒲團坐睡聊一憩前峯  
日色行西廂山堂薄暮振法鼓竹林蒙密翻樓鳥  
下山回望晚烟合樓臺咫尺迷蓬壺歸來清景尚  
可憶寒燈挂壁追詩述

聖泉亭

兩旁絕壁矗空青一道飛流激怒霆仰可看山俯  
看水籃輿小憩聖泉亭

宿長春巷贈法政和尚

我是東西南北人從師借榻叩迷因香凝丈室清  
無夢月上危峯冷逼身七寶池中分一掬

山中小池冬夏



不洞旁有亭  
名掬水亭

恒沙劫後得長春

勝國時曾  
經兵燹

茅齋幽

興年來熟獨乏新詩忝許詢

遊石山贈雲石老和尚

茲山以石錫厥名大礫小礫交相撐誰其鞭之遽  
集此不煩造物搏沙成枯松瘦竹出石隙惜無曠  
土容春耕僧家常厭肉山鄙焉用瘦骨空崢嶸道  
人獨取石爲字與石真契交前生有時膚寸白雲  
合一任去住終無情爰從兩浙來駐錫忍飢夜讀  
楞嚴經祇今年已七旬近巖棲猶趑飛猱輕我來  
借居一尺地

寺旁一尺居  
余寄讀焉

參禪時叩寒鴉聲安心



有偈學晏坐發興無端隨起行石臺曉登天空闊  
山有越重門晚入雲瓏玲山有石能點頭雲作雨  
觀臺  
哀哉衆生頑不靈

禪房牡丹次韻

曲欄杆外倚風斜一捻紅脂簇曉霞老我凡心空  
色相憑君絕艷發春華拈來丈室林泉趣占斷高  
門富貴花應是道人殷七七偷將閬苑入禪家

爲雲石咏物六首

踏遍神州不記歸謁來高臥閉巖扉應嫌世上知  
名姓一任灞山白鶴飛右錫杖



托鉢人間數十年也無奇跡也無玄笑他咒水誠  
多事頃刻能開碧玉蓮 右鉢

碧澗煙巒引與長老來步履藉扶將儒家亦自珍  
鳩杖靈壽徒聞賜孔光 右杖

麈尾驅塵手自持不教蠅蚋附霜髭從知王謝家  
中物祇與山林老衲宜 右拂子

幽尋閒過遠公廬一縷香生鵲尾爐麝火蘭煙清  
磬裏聞思大士已聞無 右爐

道人慧悟有方諸金錯菱花總不如應似价師臨  
水偈渠今是我我非渠 右鏡



追和雲起五弟從雲門登台泉絕頂之作

有序

歲已丑雲起寄讀石山台泉寺秋間招余  
往遊作文記之今丁酉雲起侍家大人讀  
書南郊古寺而余復借榻茲山追念昔遊  
已經十載人生幾何聚首不易依韻作詩  
不勝慨然卽寄雲起

台泉邑名勝我昔曾記遊所憾文筆拙未盡秋巖  
幽茲來欲續前遊意借榻遠公方丈地畱詩古壁  
字猶新過隙年華日西墜子歸家塾侍庭闈我向  
崇山踏空翠所惜怱怱去住分閉門臥盡林殿曉



試尋昔日經行處，屐痕埋沒青苔紋。  
十年舊事誰過問，一枝枯藤吾手捫。  
欲凌絕頂觀日出，且緣仄徑穿寒雲。  
日光雲影互明滅，巨靈斧劈蒼崖裂。  
曲折危梯入洞天，嶙峋書屋橫木末。  
登高弔古傾千鍾，談經慷慨前賢風。

前明許文穆公設帳于雲龍書屋從遊者皆邑中賢士

烟荒草蔓遺跡沒，鶴啼猿怨秋山空。  
邇來文治蒸棧樸，復闢講院誅蒿蓬。  
況有賢吏平雀角，返田歸壁仍雲龍。

時有欲占此山爲牛眠者，山僧訟之官。江蘇畦明府斷歸公，復興書院。明府詩：

云豈甘沉趙壁

惜我無才追曩哲，長年踪跡如饑

鴻夢想培風，將遠適依舊荒山臥。岑寂却尋舊學



久荒蕪時恐嘉苗生  
蟲賊寒窗夜火獨微吟病眼  
昏花煩拂拭遙憶南郊古寺中  
新詩天馬爭超特  
南郊有天馬峯  
拱立寺門外

曉登越觀臺看雲用雲起韻

密雲布巖谷萬里同一色  
不知下界寬獨立山逕  
仄如臨不測淵俯仰時竦息  
老樹冒兜羅遠峯聳  
奇特海色蕩空明湖光借秋拭  
須臾好風起疾掃  
溪山碧舒之覆八埏卷之入寥寂  
餘氣蒸作嵐林  
梢時一滴物態幻何窮作詩用漱滌

越觀臺看月用雲起韻



懷人佇涼月殘夜上林端對影空爲偶披衣不耐  
寒雲歸封斷石雁過響危巒安得招予季山頭與  
共看

登望江樓

茲山已千仞況乃俯危樓天外長江下雲中九派  
流夕陽開遠嶼孤鳥沒荒洲何日凌嵩岳蒼然海  
色秋

三台池上作

山頭奇石如林立瑟瑟清泉生石隙一科旣盈注  
其二脉落分明流不息固知習坎本心亨不比盈



溝誇雨積春花秋月淨微塵錦石遊鱗無遁迹我  
來了立俯金鏡照徹塵容得肥瘠三池到處盡逢  
渠笑問水中誰主客亦如臨潁百東坡聚散無端  
見空色道人抱甕灌畦來觀妙忘言兩莫逆

### 遊雷音洞

石山而戴土外實中自空古洞不見底颼颼生寒  
風道人投以石萬竅聲俱通細若戛鳴玉大者鏗  
霜鏞伏地鳴鼓角破壁盤豐隆乍聞令心駭餘響  
猶耳聾石本抱頑質寧懷不平鳴似我廢吟哦默  
坐此高峯好景一相觸豁然開塵胸欲言不可抑



刻劃嫌難工道人厭多事瞑目如潛蛰

借居耿南弟家塾

廣廈祇容膝穿牀還獨居無馨銘陋室有託愛吾  
廬看客時攜酒聽兒曉讀書隔牆聞古井行汲灌  
園蔬

結廬雖近市高臥絕囂塵徑欲埋荒草門還待故  
人空堂心遠寄小圃物同春百本自堆案寧嫌家  
具貧

訪王春山

春山以相術遊而癖嗜手  
談來涇寓宣陽道院中

頭顱如此更何成身世無勞問子卿欲與先生消



永夏聊從坐隱對紋枰夢回花院人聲靜步繞松  
壇日影清誰似東坡解棋趣不將勝敗偶縈情

肖巖詩鈔卷二終